

Կ Ա Ր Գ

ԱՌԱՆՁԻՆ ԻՐԱՎԱԲԱՆԱԿԱՆ ԵՎ ՖԻԶԻԿԱԿԱՆ ԱՆՁԱՆՑ
ՊԱՐՏԱՎՈՐՈՒԹՅՈՒՆՆԵՐԻ ԸՆՏՐԱՆՔԻ ՉԱՓԱՆԻՇՆԵՐԸ ԵՎ
ՖԻՆԱՆՍԱԿԱՆ ԿԱԶՄԱԿԵՐՊՈՒԹՅՈՒՆՆԵՐԻ ԿՈՂՄԻՑ ԴՐԱՄԱԿԱՆ
ՊԱՀԱՆՋՆԵՐԻ (ԳՈՒՅՔԱՅԻՆ ԻՐԱՎՈՒՆՔՆԵՐԻ) ՓՈԽԱՆՑՄԱՆ,
ՓՈԽԱՆՑՎԱԾ ԴՐԱՄԱԿԱՆ ՊԱՀԱՆՋՆԵՐԻ (ԳՈՒՅՔԱՅԻՆ
ԻՐԱՎՈՒՆՔՆԵՐԻ) ՎԵՐԱԲԵՐՅԱԼ ՏԵՂԵԿԱՏՎՈՒԹՅԱՆ
ՀՐԱՊԱՐԱԿՄԱՆ

1. Սույն կարգով կարգավորվում են «Հայաստանի Հանրապետության 2023 թվականի պետական բյուջեի մասին» օրենքի 9-րդ հոդվածի 23-րդ մասի հիմքով ֆինանսական կազմակերպությունների կողմից Հայաստանի Հանրապետության կառավարությանը փոխանցման ենթակա դրամական պահանջների (գույքային իրավունքների) գծով առանձին իրավաբանական և ֆիզիկական անձանց պարտավորությունների ընտրանքի չափանիշները, այդ դրամական պահանջների (գույքային իրավունքների) փոխանցման, դրանց վերաբերյալ տեղեկատվության հրապարակման հետ կապված հարաբերությունները:

2. «Հայաստանի Հանրապետության 2023 թվականի պետական բյուջեի մասին» օրենքի 9-րդ հոդվածի 23-րդ մասի հիմքով ֆինանսական կազմակերպությունների կողմից Հայաստանի Հանրապետության կառավարությանը փոխանցման ենթակա են ֆինանսական կազմակերպություններում ձևավորված և 2023 թվականի սեպտեմբերի 19-ի դրությամբ վերջիններիս ֆինանսական հաշվետվություններում առկա հետևյալ պարտավորությունների և դրանց գծով հաշվարկված տոկոսների գծով դրամական պահանջները (գույքային իրավունքները):

1	Լեռնային Ղարաբաղի կառավարության պարտատոմսերից ծագող պարտավորություններ
2	Լեռնային Ղարաբաղի հիմնադրամների պարտատոմսերից ծագող պարտավորություններ
3	Լեռնային Ղարաբաղի հիմնադրամներին տրամադրված վարկեր, Լեռնային Ղարաբաղի հիմնադրամների նկատմամբ ձևավորված դերիտորական պարտքեր
4	«Արցախի ներդրումային ընկերության» կողմից հիմնադրված «Ֆիդես հիփոթեքային ընկերություն» ՈւՎԿ ՓԲԸ-ին տրամադրված վարկեր և այլ պահանջներ
5	Ֆիզիկական անձանց վարկեր (բացառությամբ դրամական միջոցներով ապահովված վարկերի) Այդ թվում՝
5.1	Լեռնային Ղարաբաղի քաղաքացիներին Լեռնային Ղարաբաղի տարածքում անշարժ գույքի ձեռքբերման կամ վերանորոգման համար տրամադրված հիպոթեքային վարկեր
5.2	Լեռնային Ղարաբաղի քաղաքացիներին տրամադրված սպառողական կամ գյուղատնտեսական վարկեր՝ Լեռնային Ղարաբաղի տարածքում անշարժ գույքի գրավադրմամբ
5.3	Լեռնային Ղարաբաղի քաղաքացիներին ոսկու վարկերի գրավադրմամբ տրամադրված սպառողական վարկեր
5.4	Լեռնային Ղարաբաղի քաղաքացիներին Լեռնային Ղարաբաղի տարածքում օգտագործման նպատակով կամ Լեռնային Ղարաբաղի ունեցած եկամուտների ապահովմամբ տրամադրված այլ սպառողական և գյուղատնտեսական վարկեր
5.5	5.1-ից 5.4 կետերի չափանիշներին բավարարող և 2023 թվականի նոյեմբերի 8-ի դրությամբ ֆիզիկական անձանց անհուսալի վարկեր՝ բացառությամբ 2020 թվականի սեպտեմբերի 30-ի դրությամբ անհուսալի եղած վարկերի
5.6	ՀՀ քաղաքացիներին Լեռնային Ղարաբաղի տարածքում անշարժ գույքի ձեռքբերման կամ վերանորոգման համար տրամադրված հիպոթեքային վարկեր՝ բացառությամբ 2020 թվականի սեպտեմբերի 30-ի դրությամբ անհուսալի վարկերի
6	Իրավաբանական անձանց վարկեր Այդ թվում՝
6.1	Լեռնային Ղարաբաղում գրանցված իրավաբանական անձանց Լեռնային Ղարաբաղի տարածքում գործունեություն ծավալելու նպատակով տրամադրված վարկեր, որոնք կամ որոնց մի մասն ապահովված են Լեռնային Ղարաբաղում առկա գույքով՝ գտված տվյալ վարկերի ապահովվածություն հանդիսացող՝ Հայաստանի Հանրապետությունում գտնվող անշարժ գույքի, այլ հիմնական միջոցների և դրամական միջոցների արժեքի չափով

6.2	6.1 կետի չափանիշներին բավարարող և 2023 թվականի նոյեմբերի 8-ի դրությամբ անհուսալի վարկեր՝ բացառությամբ 2020 թվականի սեպտեմբերի 30-ի դրությամբ անհուսալի վարկերի
-----	--

3. Դրամական պահանջները (գույքային իրավունքները) փոխանցվում են Հայաստանի Հանրապետության ֆինանսների նախարարության և համապատասխան ֆինանսական կազմակերպության միջև ՀՀ քաղաքացիական օրենսգրքի 25-րդ գլխով սահմանված կարգով հասարակ գրավոր ձևով (որպես վարկերի խմբային փոխանցման գործարք՝ հիմք ՀՀ քաղաքացիական օրենսգրքի 299-րդ հոդվածի 4-րդ կետ) կնքված գործարքի հիման վրա: Ընդ որում, սույն հավելվածի 2-րդ կետում ներկայացված աղյուսակի 1-5.6 տողերում ներկայացված պարտավորություններով դրամական պահանջների (գույքային իրավունքների) փոխանցման գործարքները կնքվում են սույն որոշումն ուժի մեջ մտնելուց հետո հնգօրյա ժամկետում, իսկ 6-6.2 տողերում ներկայացված պարտավորություններով գործարքները կնքվում են մինչև 2024 թվականի հունվարի 31-ը ՀՀ կառավարության կողմից այդ պարտավորությունների դիտարկման արդյունքներով: Դիտարկման գործընթացն իրականացվում է ՀՀ վարչապետի հանձնարարությամբ իրավասու պետական մարմնի (մարմինների) կողմից ՀՀ կենտրոնական բանկի հետ համատեղ (համաձայնությամբ):

4. Սույն հավելվածի 3-րդ կետում նշված գործարքի շրջանակներում ֆինանսական կազմակերպությունը, ի թիվս այլնի՝

1) հավաստում է, որ ՀՀ կառավարությանը փոխանցվող դրամական պահանջները (գույքային իրավունքները) համապատասխանում են սույն հավելվածով սահմանված ընտրանքի չափանիշներին.

2) պարտավորվում է հանձնել պահանջի իրավունքը հավաստող փաստաթղթեր և հաղորդել պահանջի իրականացման համար նշանակություն ունեցող տեղեկություններ, ընդ որում՝ սույն ենթակետում նշված փաստաթղթերի կազմը և փոխանցման կարգի մանրամասները սահմանվում են համապատասխան գործարքով, որով նախատեսվում է հնարավորություն գործարքը կնքել ֆինանսական կազմակերպության կողմից ներկայացված և կողմերի միջև փոխհամաձայնեցված

ձևաչափով կազմված ազրեգացված ցանկի հիման վրա՝ պայմանով, որ փաստաթղթային հիմքերը (բնօրինակների բացակայության դեպքում՝ ֆինանսական կազմակերպության կողմից հաստատված պատճենները) կներկայացվեն գործարքով սահմանված կարգով և ժամկետներում.

3) կրում է սույն հավելվածով սահմանված ընտրանքի չափանիշներին չհամապատասխանող կամ անվավեր պահանջների փոխանցման համար պատասխանատվություն տրամադրված պետական գանձապետական պարտատոմսի անվանական արժեքի՝ այդ պահանջի գծով հաշվարկված չափով:

5. Սույն հավելվածի 3-րդ կետում նշված գործարքների կնքումից հետո մեկամյա ժամկետում ՀՀ ֆինանսների նախարարությունն իր պաշտոնական կայքում հրապարակում է ՀՀ կառավարությանը փոխանցված դրամական պահանջների (գույքային իրավունքների) վերաբերյալ տեղեկատվությունը, որը ներառում է տեղեկություններ սկզբնական պարտատիրոջ, պարտապանի և պարտավորության չափի վերաբերյալ:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎԱՐՉԱՊԵՏԻ ԱՇԽԱՏԱԿԱԶՄԻ
ՂԵԿԱՎԱՐ

Ա. ՀԱՐՈՒԹՅՈՒՆՅԱՆ